

Zahama ya Mwisho,

Na hukumu imegeuka ikaenda nyuma, na haki inasimama mbali sana; maana kweli imeanguka katika njia kuu na unyofu hauwezi kuingia. Isaya 59:14.

Tunaishi katika wakati wa mwisho. Utimiaji wa haraka wa dalili za nyakati unatangaza kwamba ujio wa Kristo umekaribia. Tunaishi katika siku makini na muhimu sana. Roho wa Mungu anaondolewa ulimwenguni taratibu lakini kwa uhakika. Mapigo na hukumu tayari yamekwisha kumwagwa juu ya wale wanaotweza neema ya Mungu. Maafa katika nchi na bahari, jamii isiyo na utulivu, hofu ya vita inatisha. Vinatabiri kukaribia kwa matukio makubwa mno.

Mawakala wa uovu wanaunganisha na kuimarisha majeshi yao. Wanajimarisha kwa ajili ya zahama kuu ya mwisho. Hivi karibuni mabadiliko makubwa yatafanyika duniani, na harakati za mwisho zitakwenda kwa kasi kubwa.

Hali ya mambo duniani inaonesha kwamba nyakati za taabu ziko karibu nasi. Magazeti ya kila siku yanaonesha viashiria vingi vya mgogoro wa kuogofya hivi karibuni. Vitendo vya unyang'anyi wa kifidhuli vinatokea kila mara. Migomo ni jambo la kawaida. Wizi na mauaji vinafanyika kila mahali. Watu waliopagawa na pepo wanaua wanaume, wanawake na watoto wadogo. Wanadamu wanapumbazwa na uovu na kila aina ya uovu unawashinda.

Adui amefanikiwa kupotosha haki na kuujaza moyo wa mwanadamu kwa mapato ya ubinafsi. "Haki inasimama mbali sana; maana kweli imeanguka katika njia kuu na unyofu hauwezi kuingia." Katika miji mikubwa kuna wengi mno wanaoishi katika hali ya umasikini na ufukara, wakikaribia kukosa chakula, malazi na mavazi; wakati katika miji hiyo hiyo wapo watu wenye mali nyingi zaidi ya mahitaji yao, wanaojistarehesha, wakitumia fedha zao kujenga nyumba zilizosheheni vitu vya kifahari, wakijipamba, lakini kibaya zaidi katika kuendekeza hamu ya chakula kinachosisimua, tamaa ya pombe, tumbaku na vitu vingine vinavyoharibu nguvu ya ubongo, vinavyopelekea kuchanganyikiwa na kushusha thamani ya mwanadamu. Kilio cha wanadamu wenye njaa kinafika mbele za Mungu, wakati kila aina ya ukandamizaji na watu wanaotumia mabavu unaongeza matokeo makubwa mno (**Testimonies for the Church 9:11, 12**).

Maandiko yanaelezea hali ya ulimwengu itakavyokuwa kabla ya tukio la ujio wa Yesu mara ya pili (**Testimonies for the Church 9:13**).

Majaribu na mashitaka ya kutisha yanawangojea watu wa Mungu. Roho ya vita inachochea mataifa kutoka upande mmoja wa dunia hadi upande mwingine. Lakini katikati ya wakati wa taabu inayokuja ambao mfano wake haujawahi kuwako tangu kuumbwa kwa taifa wateule wa Mungu watasimama bila kutikiswa. Shetani na jeshi lake hawataweza kuwaangamiza, kwani malaika wanaotenda kwa uwezo mkuu watawalinda (**Testimonies for the Church 9:17**).